

## RESOLUCIÓN REITORAL DO 3 DE SETEMBRO DE 2024 POLA QUE SE CONVOCA A SEXTA EDICIÓN DOS PREMIOS DE INVESTIGACIÓN, TRANSFERENCIA E DIVULGACIÓN CIENTÍFICA DO CAMPUS AUGA DA UNIVERSIDADE DE VIGO

Unha das accións estratéxicas do Campus Auga da Universidade de Vigo, como campus de especialización, é premiar os esforzos dos/as investigadores/as que contribúan a desenvolver a singularización do Campus Auga, a través do seu traballo nas liñas de Alimentación Funcional, Agricultura e Medio ambiente e Xestión da auga

Por este motivo convócase a sexta edición dos Premios Campus Auga, coa finalidade de recoñecer e estimular contribucións relevantes nos eidos anteriores. A dotación económica destes premios, tanto en metálico como en especie, finánciase no marco de dous convenios asinados pola Universidade de Vigo: o Convenio de Colaboración coa Consellería de Educación, Ciencia, Universidades e Formación Profesional da Xunta de Galicia para financiar o Campus Auga, logo da Resolución de acreditación publicada no DOG do día 8 de febreiro de 2024; e o Convenio Marco de colaboración coa empresa Viaqua Gestión Integral de Aguas de Galicia S.A.U., asinado o día 28 de febreiro de 2024.

A investigación é un elemento esencial para a mellora da competitividade e sustentabilidade das sociedades actuais, que mediante a innovación permite traducir as oportunidades xeradas polos desenvolvementos científicos e tecnolóxicos en novos produtos e servizos, así como en posibilidades de traballo e benestar para a sociedade.

A innovación supón tamén partir do vixente para transformalo, creando así novas dinámicas nos seus principais actores (institucións, educadores/as e educandos/as) que lles permitan indagar, descubrir, reflexionar, criticar e incluso renovar ou mesmo cambiar.

Por outra banda, a divulgación científica a través dun conxunto de actividades permite transferir o coñecemento científico e facelo accesible á sociedade, é dicir, a todas aquelas persoas interesadas en entender ou informarse sobre ese tipo de coñecemento.

Resulta, por tanto, oportuno continuar coa convocatoria destes premios mediante os que se recoñece o valor que a Universidade de Vigo outorga ao esforzo do persoal docente e investigador (PDI), Persoal Investigador (PI) e do estudantado no ámbito da investigación, transferencia, e a divulgación científica, en temáticas relacionadas coas liñas de traballo do Campus Auga. Trátase de contribuír desta forma a mellorar a proxección investigadora e social do Campus de Ourense-Campus Auga, como un campus líder nestas temáticas.

Neste senso, a Vicerreitoría do Campus de Ourense-Campus Auga convoca a sexta edición dos Premios de Investigación, Transferencia e Divulgación Científica do Campus Auga da Universidade de Vigo, de conformidade coas seguintes:

## BASES

### Primeira- Obxecto da convocatoria

A Vicerreitoría do Campus de Ourense – Campus Auga da Universidade de Vigo considera importante, para estimular a promoción do Campus Auga, premiar accións destacadas no ámbito da investigación, transferencia, e a divulgación científica, que contribúan a situar e consolidar o Campus de Ourense como un referente internacional nos seguintes eidos: Alimentación Funcional; Agricultura e Medio Ambiente; e Xestión da Auga.

Neste senso, a convocatoria ten por obxecto regular o procedemento para recoñecer, difundir e premiar traballos e accións de investigación, transferencia, e divulgación científica, relativos ás citadas liñas de traballo, que resulten de interese para o desenvolvemento e promoción do Campus Auga.

#### 1. Premios de investigación

O seu obxectivo é recoñecer diferentes facetas da actividade investigadora e de transferencia desenvolvida por persoal docente e investigador (PDI), persoal investigador (PI) ou estudantado da Universidade de Vigo nas temáticas obxecto da convocatoria, entre as que se atopan: Traballos Fin de Grao (TFG), Traballos Fin de Mestrado (TFM), Teses de Doutoramento, e contribucións científicas de alto impacto publicadas en 2021, 2022 ou 2023, sempre que a autoría corresponda a PDI, PI ou estudantado da Universidade de Vigo, e os méritos non foran presentados ás anteriores edicións destes premios nin haxa identidade substancial con outros que xa concorreron a convocatorias anteriores.

Entendese por contribucións científicas aquelas que se realizan nos medios de difusión propios de cada ámbito de coñecemento, como poden ser artigos en revistas indexadas, libros, capítulos de libros, monografías, recensións, etc.

#### 2. Premios de transferencia

O propósito deste apartado é distinguir os resultados relevantes de transferencia, entendendo como tales patentes en explotación, produtos ou servizos comercializados por algunha empresa, estudos e informes de impacto contrastado, sempre que fosen resultado dun proxecto ou contrato realizado na Universidade de Vigo e finalizado en 2021, 2022 ou 2023. Para elo, será necesario que todos os membros do proxecto ou contrato, do que deriven resultados relevantes de transferencia, cumpran a condición de ser PDI ou estudantado da Universidade de Vigo, e os méritos non foran presentados ás anteriores edicións destes premios nin haxa identidade substancial con outros que xa concorreron a convocatorias anteriores.

### 3. Premios de divulgación científica

Preténdese tamén premiar accións e actividades de divulgación científica realizadas nos anos 2021, 2022 e 2023 nas temáticas da convocatoria, que contribúan á promoción do Campus Auga e a divulgar a acción e o coñecemento científico producido no seu seo.

#### Segunda - Modalidades dos premios

Os premios, e os accésits no seu caso, consistirán no recoñecemento público outorgado pola Universidade de Vigo a través dunha certificación oficial que, de ser posible, será entregada nun acto institucional organizado a tal efecto.

Asemade, os premios serán dotados economicamente en función da modalidade á que concorran os méritos presentados, tal como se detalla máis abaixo. Esta dotación financíase con cargo a dous convenios asinados pola Universidade de Vigo: por unha banda coa Consellería de Educación, Formación Profesional e Universidades da Xunta de Galicia como achega ao Campus Auga, e por outra banda coa empresa Viaqua Gestión Integral de Aguas de Galicia SAU, distribuíndose como se indica de seguido:

- Viaqua Gestión Integral de Aguas de Galicia, S.A.U. abonará un máximo de 2.800,00 € en metálico que pagará directamente aos premiados nas categorías A e E. Ademais proporcionará dous premios en especie en concepto de accésit.
- A Universidade de Vigo abonará un máximo de 6.195 € en metálico, con base no convenio resultante da Resolución da Xunta de Galicia pola que se acredita o Campus Auga (DOG do 8 de febreiro de 2024), que pagará directamente aos premiados nas categorías B, C e D, con cargo á partida orzamentaria 2024 AUGA 421S 484.99.

Para poder realizar o pagamento dos importes correspondentes aos premios, a Vicerreitoría do Campus de Ourense-Campus Auga solicitará ás persoas premiadas os correspondentes datos bancarios.

Convócanse cinco modalidades de premios, creándose para as catro primeiras (A, B, C e D sinaladas a continuación) tres premios en metálico, un por cada unha das seguintes categorías:

- Alimentación Funcional
- Agricultura e Medio Ambiente
- Xestión da Auga - VIAQUA

Cada traballo ou mérito soamente poderá presentarse ou vencellarse a unha das tres categorías indicadas anteriormente.

Para a derradeira modalidade (letra E indicada de seguido), establécese un único premio.

Desta maneira as modalidades son as seguintes:

**A. Premio ao TFG/TFM máis destacado.-**

Cada premio consistirá nun diploma acreditativo para a persoa autora do TFG/TFM e para a/s persoa/s titora/s, así como dunha dotación en metálico de 700 € para o/a autor/a (suxeita ás retencións do IRPF que estableza a normativa vixente), que será abonada por Viaqua Gestión Integral de Aguas de Galicia, S.A.U.

**B. Premio de investigación a teses de doutoramento.-**

Cada premio consistirá nun diploma acreditativo para a persoa autora da tese de doutoramento e para a/s persoa/s directora/s da mesma, así como nunha dotación en metálico de 920 € para o/a autor/a (suxeita ás retencións do IRPF que estableza a normativa vixente), que será abonada pola Universidade de Vigo.

**C. Premio de investigación á mellor contribución científica.-**

Cada premio consistirá nun diploma acreditativo para a persoa autora, así como para a/s coautora/s, de ser o caso, e nunha dotación en metálico de 495 € (suxeita ás retencións do IRPF que estableza a normativa vixente) para a persoa autora, que será abonada pola Universidade de Vigo.

**D. Premio ao mellor resultado de transferencia.-**

Cada premio consistirá nun diploma acreditativo para a persoa autora e a/s coautora/s, de ser o caso, e nunha dotación en metálico de 650 € (suxeita ás retencións do IRPF que estableza a normativa vixente) para a persoa autora, que será abonada pola Universidade de Vigo.

**E. Premio a accións ou actividades de divulgación científica.-**

O premio consistirá nun diploma acreditativo para a persoa autora e a/s coautora/s, de ser o caso, e unha dotación en metálico de 700 € (suxeita ás retencións do IRPF que estableza a normativa vixente) para a persoa autora, que será abonada por Viaqua Gestión Integral de Aguas de Galicia, S.A.U.

En función da cantidade e calidade de traballos presentados nas modalidades anteriores, a comisión avaliadora -descrita na base quinta da presente convocatoria- poderá, se o considera oportuno, conceder un accésit nun máximo de dúas das modalidades convocadas. Este accésit consistirá nun diploma acreditativo para a persoa autora, coautora/s ou, de ser o caso, persoa/s titora/s, e nun agasallo en especie para a persoa autora que será aportado por Viaqua Gestión Integral de Aguas de Galicia, S.A.U.

## Terceira - Requisitos das persoas participantes

Para concorrer a calquera das modalidades poderán ser candidatos/as o PDI e PI que no momento da convocatoria se atopen en situación de servizo activo na Universidade de Vigo, e o estudiantado da Universidade de Vigo matriculado nos cursos 2021-2022 ou 2022-2023, que cumpra os requisitos da modalidade do premio ao que se presenta.

- Ningún solicitante, membro da achega, autor ou coautor do mérito poderá concorrer simultaneamente a máis dunha modalidade de premios nin a máis dunha das liñas de traballo ou categoría descritas nesta convocatoria.
- No caso da modalidade A, os traballos presentados deberán ter sido avaliados cunha nota mínima de 9 sobre 10.
- No caso da modalidade B, os traballos presentados deberán ter sido avaliados cunha nota de sobresaínte *cum laude*.
- No caso das modalidades C, D, e E, de ser o caso, a solicitude deberá contar co visto bo de todos/as os/as coautores/as da contribución, salvo imposibilidade xustificada. Neste senso, consideraranse persoas beneficiarias, aos efectos de certificación da resolución de concesión, tódalas persoas autoras da contribución. No caso da dotación económica considerárase como beneficiaria só á persoa solicitante.
- Non se poderán presentar traballos ou méritos que foran presentados a anteriores edicións destes premios ou nos que se aprecie unha identidade substancial con outros que xa concorreron a convocatorias anteriores.
- Os traballos ou méritos presentados soamente poderán estar vencellados a unha única liña de traballo ou categoría descrita nesta convocatoria.

A Universidade comprobará os datos académicos do alumnado, así como que estiveron matriculados nos cursos indicados, e a relación laboral do persoal de investigación. As persoas participantes poden exercer o seu dereito de oposición á dita comprobación, a través do procedemento da sede electrónica "SXER", do Catálogo de Procedementos: <https://sede.uvigo.gal/public/catalog-detail/solDerProtDatos>, achegando a documentación acreditativa correspondente xunto coa súa solicitude.

## Cuarta - Solicitudes e prazo de presentación

As solicitudes dirixiranse á Vicerreitoría do Campus de Ourense, dacordo co seguinte procedemento:

Primeiro.- A persoa solicitante cumprimentará o formulario de solicitude a través da secretaría virtual da Universidade de Uvigo:

[https://secretaria.uvigo.gal/uv/web/formularios/encuesta/cubrir\\_paso1/13601](https://secretaria.uvigo.gal/uv/web/formularios/encuesta/cubrir_paso1/13601)

Unha vez cumprimentado, premerá no botón "Imprimir PDF" do formulario, descargará e asinará con certificado dixital. Este será o documento que presentará na sede electrónica, segundo as indicacións do seguinte paso.

Segundo.- Dentro do prazo de solicitudes, accederá á sede electrónica da Universidade de Vigo (<https://sede.uvigo.gal>), elixindo o procedemento "VI Edición dos Premios de Investigación, Transferencia e Divulgación Científica do Campus Auga da Universidade de Vigo". Despois de ler a información deberá premer no botón "INICIAR TRAMITACIÓN". No campo "Documentación" engadirase o documento PDF xerado no paso primeiro. De seguido, premerá en "enviar solicitude".

O "xustificante de presentación en sede" xerado inclúe a ligazón e o contrasinal de acceso que se precisará para cargar o traballo ou mérito que se presenta á convocatoria. Dito arquivo co traballo ou mérito debe **nomearse co número de xustificante de presentación** e seguirá o modelo Anexo I que acompaña a esta convocatoria. Deberá cargarse, en formato .pdf no enderezo indicado dentro do prazo de presentación de solicitudes.

Non se admitirán a trámite as solicitudes presentadas por outras vías.

**O prazo para a presentación das solicitudes comeza ás 00:00 horas do día 10 de setembro de 2024 e remata ás 23:59 horas do día 22 de setembro de 2024.**

De conformidade co previsto no artigo 68 da Lei 39/15, de 1 de outubro do procedemento administrativo común das administracións públicas, de advertirse defectos formais ou omisión na solicitude ou na información que debe acompañala, comunicarase á persoa solicitante, que disporá de 10 días hábiles para emendar a falta ou acompañar os preceptivos documentos, facéndose constar que si así non o fixese, teráselle por desistido da súa petición, arquivándose a mesma, previa resolución ao efecto, de acordo co artigo 68 da citada Lei.

## Quinta - Procedemento e criterios de selección

Os méritos recibidos entregaranse, para a súa valoración, a unha comisión formada polos seguintes membros:

- O/a director/a do Campus Auga, que actuará como presidente/a.



- Oito persoas pertencentes ao sector PDI con dedicación a tempo completo e vencellamento permanente. Cada centro dos oito que integran o Campus de Ourense, procederá a elixir na respectiva Xunta de Centro ou na Comisión Permanente a unha persoa do sector PDI de entre as que forman parte da Xunta de Centro e cumpran os requisitos establecidos máis abaixo. A tal fin, dende a Vicerreitoría do Campus de Ourense-Campus Auga requirirase con antelación suficiente aos centros para que procedan á devandita elección e comuniquen o nome da persoa elixida á propia Vicerreitoría do Campus de Ourense-Campus Auga. Unha destas persoas actuará como secretaria da Comisión.
- Unha persoa representante da empresa Viaqua Gestión Integral de Aguas de Galicia, S.A.U.

Ditos membros non poderán ser solicitantes nin formar parte de ningunha das solicitudes presentadas ás diferentes modalidades dos premios desta convocatoria. Tampouco poderán ser titores de traballos fin de grao ou traballos de fin de mestrado nin directores/as das teses de doutoramento que se presenten á convocatoria.

Os criterios para a valoración dos méritos serán os seguintes:

Criterios premios Investigación e Transferencia (modalidades A, B, C e D).-

- Vencellamento con algunha das liñas de traballo, ou categoría, que figuran neste convocatoria e indicada polo/s participante/s (6 puntos). Se a puntuación neste apartado é de menos dun 4, o traballo será descartado pola Comisión.
- Orixinalidade e innovación no tratamento dos temas obxecto do premio (4 puntos).
- Calidade, rigor e metodoloxía científica axeitada ao problema exposto (6 puntos).
- Utilidade ou aplicabilidade social e científica, factibilidade de aportar a resolución de problemas ou necesidades científicas ou sociais (4 puntos).

Para as modalidades A e B, no caso de empate terase en conta a nota académica obtida nos estudos de grao, posgrao ou doutoramento cursados polo/a autor/a e relacionados coa categoría do premio.

Para a modalidade C, a comisión disporá dun informe bibliométrico realizado por persoal técnico da Biblioteca da Universidade de Vigo.

Criterios premios Divulgación Científica (modalidade E).-

- Vencellamento con algunha das liñas de traballo ou categorías indicadas nesta convocatoria (6 puntos). Se a puntuación neste apartado é de menos dun 4, o traballo será descartado pola Comisión.
- Creatividade no tratamento dos temas obxecto do premio (4 puntos).
- Calidade, rigor e claridade da linguaxe empregada na divulgación científica (6 puntos).

- Impacto potencial ou factual da achega (2 puntos).

A puntuación máxima que poderá acadar cada modalidade de premio será de 20 puntos para as modalidades A, B, C e D e de 18 puntos na modalidade E, sendo preciso obter un mínimo de 9 puntos para resultar seleccionado.

O fallo da comisión non estará suxeito a apelación. A comisión poderá declarar deserto algún ou todos os premios de acordo coas valoracións obtidas ou por ausencia de solicitudes.

## **Sexta - Resolución do procedemento**

A Comisión elevará ao reitor a proposta de concesión de premios, quen emitirá a resolución correspondente.

A publicación dos actos que integran este procedemento no taboleiro de anuncios da sede electrónica da Universidade de Vigo (<https://sede.uvigo.gal/>), servirá de notificación para todos os efectos, da acordo do previsto no artigo 45 da Lei 39/2015, do 1 de outubro, do procedemento administrativo común das administracións públicas.

Ademais, tanto a convocatoria como as resolucións que integran este proceso publicaranse a título divulgativo na páxina web da Universidade de Vigo e na páxina web do Campus Auga <https://campusauga.uvigo.es>

O prazo para resolver este procedemento será dun máximo de tres meses contados a partir do día seguinte da finalización da presentación de solicitudes.

## **Sétima. - Información sobre a convocatoria**

Calquera dúbida sobre o contido desta convocatoria será atendida na Vicerreitoría do Campus de Ourense (tfno. 988 38 73 00) ou no correo electrónico: [vicou@uvigo.es](mailto:vicou@uvigo.es).

## **Oitava - Aceptación das presentes bases**

O feito de participar nesta convocatoria de Premios de Investigación, Transferencia e Divulgación Científica do Campus Auga, implica a aceptación das súas bases.



## Novena.- Información sobre Protección de datos

De acordo co disposto no artigo 13 do Regulamento (UE) 2016/679, do Parlamento Europeo e do Consello, de 27 de abril, relativo á protección da persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento Xeral de Protección de Datos ou "RXPD") e co disposto no artigo 11 da Lei orgánica 3/2018, de 5 de decembro, de protección de datos persoais e garantía dos dereitos dixitais, informámoslle que os datos que vostede nos facilite na solicitude, serán tratados baixo a responsabilidade da Universidade de Vigo, coa finalidade de xestionar a convocatoria "VI Edición dos Premios de Investigación, Transferencia e Divulgación Científica do Campus Auga da Universidade de Vigo".

Conforme o disposto no artigo 45 da Lei 39/2015, do 1 de outubro, do procedemento administrativo común das administracións públicas, a Universidade de Vigo está lexitimada para a publicación daqueles datos persoais que fosen precisos atendendo á natureza e finalidade do acto que sexa obxecto de publicación. Non obstante, e co fin de previr riscos para a publicidade de datos persoais de vítimas de violencia de xénero, dita circunstancia deberá comunicala a persoa afectada coa maior celeridade posible á Unidade de Igualdade da Universidade de Vigo ao teléfono 986 813419 ou ao enderezo electrónico [igualdade@uvigo.gal](mailto:igualdade@uvigo.gal).

Estes datos trataranse durante o tempo imprescindible para cumprir coa citada finalidade e serán conservados durante o prazo necesario para determinar as posibles responsabilidades que se puideran derivar de dita finalidade e do tratamento dos datos.

As persoas interesadas teñen dereito a solicitar ao responsable do tratamento, en calquera momento, o acceso, rectificación ou supresión dos seus datos persoais e a limitación do seu tratamento. Tamén terá dereito a oporse ao devandito tratamento, así como a solicitar, salvo casos de interese público e/ou exercicio de poderes públicos, a portabilidade dos seus datos.

Os citados dereitos poderán exercelos a través da sede electrónica da Universidade de Vigo <https://sede.uvigo.gal/> (preferentemente a través do procedemento específico SXER – Exercicio dereitos sobre protección de datos) ou mediante solicitude dirixida ao Reitor da Universidade de Vigo e presentada ante as Oficinas de Asistencia en Materia de Rexistro da Universidade de Vigo ou calquera dos rexistros ou oficina de correos indicados no artigo 16 da Lei 39/2015, de 1 de outubro, do procedemento administrativo común das administracións públicas e remitida á Secretaría Xeral da Universidade de Vigo, Campus universitario Lagoas-Marcosende, 36310 Vigo (Pontevedra). Para máis información: <https://www.uvigo.gal/proteccion-datos>

Igualmente poderán dirixir dita solicitude directamente ao Delegado de Protección de Datos da Universidade de Vigo, ao enderezo electrónico: [dpd@uvigo.gal](mailto:dpd@uvigo.gal)

Así mesmo, se a súa solicitude non é atendida pola Universidade de Vigo, teñen dereito a presentar unha reclamación ante a Axencia Española de Protección de Datos (AEPD).

## Décima- Outra información

Contra esta resolución, que esgota a vía administrativa, poderase interpoñer recurso perante a xurisdición contencioso adminis (recibimento da súa notificación), de conformidade co disposto na Lei 29/1998, do 13 de xullo, reguladora da xurisdición contencioso administrativa.

As persoas interesadas poderán optar por interpoñer contra esta resolución recurso de reposición, no prazo dun mes contados a partir do día seguinte á publicación da presente resolución (ou dende o día seguinte ó recibo desta notificación), perante o mesmo órgano que a ditou. Neste caso non se poderá interpoñer un recurso contencioso- administrativo ata que sexa resolto expresamente ou se producira a desestimación presunta do recurso de reposición interposto, segundo o previsto no artigo 123.2 da lei 39/2015, de 1 de outubro, do Procedemento Administrativo Común das Administracións Públicas.

O Reitor

## ANEXO I

### SEXTA EDICIÓN DOS PREMIOS DE INVESTIGACIÓN, TRANSFERENCIA E DIVULGACIÓN CIENTÍFICA DO CAMPUS AUGA DA UNIVERSIDADE DE VIGO

|  |  |
|--|--|
| TÍTULO DO MÉRITO   |  |
| MODALIDADE Á QUE OPTA  |  |
| LIÑA DE TRABALLO OU CATEGORÍA VENCELLADA AO MÉRITO   |  |
| Resumo do mérito (máximo 500 palabras)   |  |
|  |  |
| Breve xustificación da relación do contido do mérito presentado coas liñas de traballo ou categorías indicadas na convocatoria (máximo 500 palabras) |  |
|  |  |
| Breve xustificación da adecuación do mérito á convocatoria e á modalidade á que concursa (máximo 300 palabras)                                       |  |
|  |  |